



Vita de ploania y de paisc



“I te cherdì con to ennom” dij le Signur.

La ploania d'La Pli tol sò con ligreza te sòa comunité **Greta Peslalz** (Tlea) y ti fej les miús aodanzas ai geniturs Tobias y Doris: che Greta pói cresce tla fede, vire tla speranza y sperimenté l'amur de Chelbeldio y dla jont.



Enformaziuns y termins

Sorvisc ai Jogn: le SaJ Val Badia lascia alessi che le sorvisc de consulenza por jogn, jones y geniturs é davert dertan l'isté y cina mez setember, sòn apuntamont o tres telefonn (☎ 342 8410721 o barbara@jogn.org). An pó damané do na consulenza personala sòn temesc co reverda la joneza y/o l'educaziun.

Istitut Ladin Micurá de Rù: al ven chirí por d'isté jogn y/o jones co á belo fat l'ejam de maturité a daidé fá na enrescida sozio-linguistica tla Val Badia y te Gherdena. L'enrescida ven fata dal Istitut, adöm con i Istitut culturai ladins de Fascia y de Fodom/Col y con l'Università de Tront. Le vendres, ai 25 de jügn, gnará tigní na encuntada online, olach'al gnará dé les spligaziuns avisa sòn les porsones ch'an ó invi da tó pert al'enrescida, sòn les schedes ch'ares messará scrí fora y de co ch'ares dess gní partides fora y coudes adöm. Le laur podará spo gní fat dertan mensc de messé y agost. Al ven pité n bun paiamont! Sc'i seis enteressé/ada da fá empara, menede preibel na e-mail a info@micura.it, olach'i Ves presenteis der en cört. Al Ves gnará spo mené n link por tó pert al'encuntada online de presentaziun dl'enrescida.

La Spona: la strotöra sozuala “La Spona” – Comunité Comprensoriala de Puster” – chir da setember 2021 ennant personal: 1 post al 75% tal salf de laur (danmisdé) y 1 post al 75% tles abitaziuns (domisdé). Al ven chirí personal con còstes spezialisaziuns: operadú/essa sozio-assistenzial/a, operadessa por handicap o jont atompada, operadú/essa sozio-sanitar/a. Por enformaziuns preibel cherdé sò le ☎ 0471 843060 y damané do la manajadessa, Sabine Federa.

Comune de Mareo: dal 21 de jügn ennant sarál en orar nò de daurida dai ofizi comunai por le dedemesaledema domisdé; ai sará daverc dales 15:00 ales 17:00!

Biblioteca: la biblioteca "Angelo Trebo" romagn slüta dai 21 de jügn ai 4 de iuli.

An adora dōta na vita por capí che al ne va nia debojügn da capí dōt. (Cina)

Dōt le bun a: Anna Ellecosta Orru, *Maran* * 22.06.1937
y a dūc chi co á santennom y complesc i agn cōst'edema

Impressum: Ploania d'La Pli; redaziun Franz Rigo y Edith Willeit
Comunicaziuns: cina le dedemesaledema sera a Franz Rigo, ☎ 0474 500978 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas
✉ klsottsas@rolmail.net

Calogna Al Plan: ☎ 0474 501006
Radio de Ploania: 93,00 MhZ

UNITÉ PASTORALA



VAL BADIA
www.unitepastorala.org

Ann B

20.06.2021 - 12. domegna ia por l'ann

n. 30

Nia se lascé tó dla pora

📖 **Iob 38, 1.8–11 | 2 Cor 5, 14–17 | Mc 4, 35–41**

Dal Vangelo do San Merch:

³⁵En chel de, canch'al ea gnü dassetera, ti á Gejú dit a sù discepu: I jun ia sòn l'atra spona. ³⁶Ai á orcé demez la jont y é piés ia con che barca, sòn chera che el ea sonté; n valgünes d'atres barches l'accompagnâ. ³⁷Te n iade él gnü n ont rodel der sterch y les ones batea sora barca ete, tan che la barca â motü man da s'emplí d'ega. ³⁸Mo el s'an stea ponü te barca iadedô sòn n plomac y dormia. Ai l'á cherdé y scraia: Maester, ne t'an valel nia ch'i jun sot? ³⁹Danló él loé sò, ti á manacé al ont y ti á dit al le: Scuta, sta chit! Y l'ont s'á sboné, y al ea gnü döt chit. ⁴⁰Y al ti á dit: Ciodi eise pa na te pora? Ne n'eise ciamó degüna fede? ⁴¹Danló ái ciaté na gran tema y ai dijea önn al ater: Ci sort de n chescian é pa cösc, ch'al é cinamai l'ont y le le co ti olga?

I ponsun do: *Sce dui é sontés adöm tla medema barca ti aspetel le medemo destin. La storia dla tempesta sòn le lé o se dí che Gejú é te vigne prigo y te vigne tema con nos tla medema barca y partesc nosc destin. Cösc messunse entres endô s'enmaginé, por capí ci ch'al ven cunté: Chel Bel Dio enstes é con nos te barca! Co podunse pa spo ciamó avei fistide da ji sot?*

I periun: *Dio onipotent, tō vegnes con nos ince sce i ne sontiu nia tōa presenza. I n'án nia bria da se teme, deache tō es pa nos. Fá sterscia nosta fede che tō s'accompagneies, ince sce i ne t'odun nia. Por Crist, nosc Signur.*

Vesco Wilhelm Egger "Sonntagsbibel"



📖 **Letōres dla 13. domegna ia por l'ann:**

Sap 1, 13–15; 2, 23–24 | 2 Cor 8, 7.9.13–15 | Mc 5, 21–43

Edema liturgica dai 20.06. ai 27.06.2021		
DOM 20.	12. domegna ia por l'ann	<i>Adalbert, Margareta</i>
08:30	gran messa por dōta la ploania s.m. de iubileo por 50 agn Joneza da Paur s.m. por les families Facchini y Stuffer	oferta por la ploania
14:00	funziun dal Bato de Greta Peslalz	
10:00	<i>s.m. a Al Plan</i>	
Lön 21.	<i>Alvije (Lovije) da Gonzaga, Alban</i>	
18:00	<i>s.m. a Al Plan</i>	
Ded 22.	<i>Paulin, John Fisher y Thomas Morus, Christina, Wilhelm</i>	
07:30	s.m. en onú de San Padre Pio s.m. por † Giovanni Ploner, La Munt	
Dem 23.	<i>Edeltraud, Hildulf</i>	
Jöb 24.	GRAN FESTA DAL NADÉ DE SAN JAN LE BACIADÚ, Ivan	
19:30	s.m. por †† Vigile, Maria y Sr. Arcangela Comploi, Mōra s.m. por vis y †† dles families de Tomele s.m. por †† Monica Erlacher y Hermann Ploner	
Ven 25.	<i>Wilhelm, Eleonora, Dorothea</i>	
→ 19:30	oraziun da Taizé	
Sab 26.	<i>Sabeda de Santa Maria Vigile da Tront, Jan y Paul</i>	
07:30	s.m. en onú de Santa Maria, Sant'Antone y San Salvester s.m. por † Emma Frontull ved. Ellecosta, Bastl	
18:00	<i>s.m. prefestia a Al Plan</i>	
DOM 27.	13. domegna ia por l'ann	<i>Hemma da Gurk, Ziril d'Alessandria</i>
08:30	gran messa por dōta la ploania s.m. por †† Carlo y Maria Willeit, Ansele s.m. por †† Ludwig, Iuliana y Irene Erlacher, Plaza	oferta "Obolo de San Pire"
14:00	funziun dal Bato de Jana Ellecosta	
10:00	<i>s.m. a Al Plan</i>	
<i>ministronc:</i>	<ul style="list-style-type: none"> • dedolōnesc y sabeda: Sara y Ivan • jōbia y domegna: Maria y Rosina 	

24 de jügn: Gran festa dal Nadé de Jan Batista

Jan Batista é con Santa Maria le su sant de chel che la liturgia recorda so nadé, plü avisa dal 5° seco encá ai 24 de jügn, avisa 6 mensc dan le Nadé de Gejú Crist. Tal calender liturgich é cōsc de porté ete desco na solenité (gran festa).

I avenimonc demorveia de cōsc nadé nes mostra sö l'empörtanza de Jan tla storia dla salveza. El é sön le limo danter la vedla y la nea aleanza y söa misciun é stada chera da arjigné ca, tres söes pordiches y so scrai do converjiun y penitonza, l'avent de Gejú, y ensciö da encündé che le regn dal ci é dampró.

Dal Vangelo do San Lūca (Lūca 1, 57–66.80)

⁵⁷Por Elisabeta êl gnü le tomp da sté de pert, y ara á moü al monn n fi. ⁵⁸Sü ejins y söa parontela á aldí ci gran misericordia che le Signur ti á desmostré y se ralegrá con era. ⁵⁹Do otedé éσαι gnüs a lascé zircunziyé le möt y orea ti meter l'ennom de so pere Zacaría. ⁶⁰Mo söa oma s'á motü decuntra y á dit: Na, Jan déssel avei ennom. ⁶¹Ai ti á respognü: Al n'é degügn te töa parentela co á ennom ensciö. ⁶²Spo ái damané so pere con segns, desche le möt dea avei ennom. ⁶³Al á damané do na tofla y á scrit lassora a morveia de düc: So ennom é Jan. ⁶⁴Tal medemo momont êl endô bun da adoré la bocia y la lenga y al baiâ y aprijá Idio. ⁶⁵Y düc chi co viea te chi versc s'á spordü y an cuntâ de dōtes cōstes cosses te döt le raiun dles munts dla ludea. ⁶⁶Düc chi co aldía de cōsc, se fajea ponsiers y dijea: Ci gnarál mo mai fora de cōsc möt? Deache al ea tler che le Signur ea con el. ⁸⁰Le möt cherscea sö, y so spirit gnea da forza. Jan á spo vit tal desert cina en chel dé ch'al á cialé l'enciaria de se presenté te Israel.

"Con Ojep da Nazaret fora por cōsc ann y fora por nosta vita" (10)



„I creii che Chel Bel Dio opereia tres sü sanc“

Önn co se damana te na maniera particolare a'aiüt de Sant Ojep é Papa Francesch. I mo recordi ciamó avisa che, da mia vijita „ad limina“ d'aorí 2013, n mens do che al ea gnü lité, ál dit a nos veschi che al á na statua de Sant Ojep te so ofize. La particolarité de cōsta statua é che ara mostra n Ojep co dorm. Papa Francesch á cunté che al scrí tres endô sü fistidi y söes preocupaziuns sön de pices zetoles y les met sot al plomac de Sant Ojep. Dlun s'la rienn ál ciamó dit le Papa: „Les zetoles ven tres deplü“. Y ál á enjunté en confidionza: „I creii che Chel Bel Dio opereii tres sü sanc. I sun dla frema convinziun che Sant Ojep, co á desco misciun de vita le compit da ciaré de Maria y Gejú, ne se desmoncia nia de me, de os, de dōta la Dlijia.“

[...] I envieii düc i credonc, les comunités de ploania y de convont da ti jí sot al significat de Sant Ojep tla storia dla redenziun tres l'oraziun, te incuntades con la Bibia, te discusiuns de fede y tal'anunziaziun.

Por interzesciun de Maria, oma de Dio y de Sant Ojep ves benedesci y ves acompagneii Idio tla Trinité co nes conesc, opereia danter nos y ne se desmoncia nia de nos. [...]

Osc Vesco + Ivo Muser

Festa de Sant Ojep, 19 de merz 2021